

Makila na Klisto

Makila na Klisto

Liloba na liboso oyo; toyebi kobikisama bobele na makila na Yesu Klisto. "Na nse na Mibeko biloko yonso bipetwi na makila mpe soko makila masopani te, kolimbisama na masumu ejali te." (Baebele 9:22)

Makila na nyama mayebi kobikisa biso te. Yesu Klisto abikisi bato na ye na makila na ye moko."... mpo na makila na bantaba mpe na bana na ngombe te kasi na makila na ye moko." (Baebele 9:12). Ejali malamumu biso koyeba ntina na likambo oyo malamumu ete, Bobele makila na Nkolo Yesu ejali na nguyana na kolongola masumu na biso, "Mpo ete makila na bangombe mpe bantaba ekoki kolongola masumu te." (Baebele 10:4)

Biso tojalaki baombo na Satana mpe tojalaki kosalela ye mosala. Yesu asikoli bato na ye na makila na ye moko. "Yo obomami mpe na makila na yo osikoli mpo na Njambe bato na mikili yonso ... mpe bakojala bakonji na mokili." (Emoniseli 5:9,10)

Soko ye asikoli biso te tiki toyebi kobikisama te. Kasi toyebi solo ete, Mosala osalaki ye na ekulusu esukisa lisiko na bato yonso bakondima ye. Nkolo Yesu alobaki ete, "Ngai nasili kokumisa yo na mokili. Nasilisi mosala mopesi yo ngai ete nasala yango." (Yoane 17:4)

Tojalaki bato na mabe na liboso na Njambe. Tokoyeba kolongisama na miso na ye boni? Paulo alobi ete; "... awa elongi biso na njela na makila na ye, tokobika na ntango na nkanda." (Baloma 5:9). Yesu Klisto ajali Mobikisi na ntina ete na ye atangisi makila na ye na ekulusu mpo na kolongisa bato bakondima ye. Eloko mosusu moko ekoki kosala mosala yango te, bobele mosala esalaki Yesu Klisto ye moko na ekulusu. Makila na ye ejali na nguyana na kosilisa kolongola na masumu na biso nye.

Tojalaki bato na mbindo. Tokopetwa boni? "Yesu Klisto alingaki biso, mpe asukoli biso na masumu na biso na makila na ye, mpe ajalisi biso bokonji na banganga mpo na Njambe Tata na ye; mpo na ye nkembo, na nguyana, libela na libela, bobele bongo." (Emoniseli 1:5-6)

Soko ye apetoli biso te tokopetwa te, mpe tokoyeba kojala na ndako na Tata te. Yoane akomaki ete, "Moko na mikolo alobi na ngai ete, Baoyo balati bilamba mpembe bajali banani, mpe bauti wapi? Nalobi na ye ete, Nkolo na ngai, yo oyebi. Alobi na ngai ete, Bajali baoyo babimi na monyoko monene. Basukoli bilamba na bango, mpe bayeisi yango mpembe na makila na Mwana na Mpate; yango wana bajali liboso na kiti na bokonji na Njambe, mpe bakosalelaka ye butu na moi kati na Tempelo na ye, mpe Mofandi na kiti na bokonji akojipa bango." (Emoniseli 7:14-15)

Tojalaki mosika na Njambe na masumu na biso. Tokoyeba kobelema na tata boni? "Na ntango yango bojangaki Klisto, bokabwanaki na koyangana na Yisalaele mpe bojalaki bapaya na kondimana na bilaka, bojalaki na elikia te. Bojangaka Njambe kati na mokili. Nde sasaipi bino bojali kati na Klisto Yesu; bojalaki mosika liboso, nde bosili kobelema mpo na makila na Klisto." (Baefese 2:12-13)

Ye moko asaleli bato na ye mosala oyo na kokamwa. Tojali na kati na motema na ye moko, mpe tojali penepene na Tata pelamoko ye ajali penepene na ye.

Biso tolinganaki na Njambe te, tojalaki na ye likunya. Tokoyeba kojanga koyebana na Njambi boni? "Mpe mpo na ye ajongisa biloko yonso epai ne ye, awa esili ye koyeisa kimia mpo na makila na ekulusu na ye." (Bakolose 1:20)

Sasaipi tojali na kimia biso mpe Njambe na biso; tobangi ye te pelamoko Njambe alingi koboma biso. Ye moko ajali Tata na biso na bolingo na motema na ye, mpe tojali bana babali na Tata. Mwana mobali ajali na nguya na kokota na ndako na Tata na ntina ete ye mpe Tata balingami na bolingo na seko.

Bayuda bajalaki na Yawe elaka, kasi biso bato na mabota mosusu tojalaki na ye elaka te. Sikawa tojali na ye elaka mpo na Nkolo Yesu asili kosala kondimana na sika na nguya na makila na ye. Kondimana na kala ejalaki elaka na Bayisalaele kosala misala na kotosa mibeko na Nkolo.

Kondimana na sika ejali elaka na motema na Nkolo ye moko, na misala na bato te. "Yesu ... akamati mpe kopo, mpe esili ye kotonda, apesi epai na bango, ye ete, Bomela na yango, bino yonso. Mpo ete oyo ejali makila na ngai na kondimana na sika masopameli bato mingi mpo na kolimbisa masumu." (Matai 26:27-28). Makambo na kalakala maleki, makambo na sasaipi masili kokoma.

Soko yo olingi koyamba malamumu na likabo oyo, ondima yango na motema na yo. Soko yo oyoki njala mpe biloko na kolia bijali, yo okosilisa njala bobele soko yo okolia biloko. "Ye oyo akoliaka mosuni na ngai mpe akomelaka makila na ngai ajali na bomoi na seko mpe ngai nakosekwisa ye na mokolo na nsuka." (Yoane 6:54)

Bobele na komela makila na Yesu Klisto yo okojala na bomoi libela. Komela makila na ye ejali kondima ye mpe kondima liwa na ye na ekulusu mpoa na yo.

Bobele bato basili kobulisama bakokota epai na Njambe. Tokojua kobulama oyo wapi? "Bobele bongo mpe Yesu ayokaki mpasi libanda na ekuke mpo na kobulisa bato na njela na makila na ye moko. Boye tokenda libanda na molako epai na ye, awa ejali biso kokumba matioli na ye. Jambi tojali na mboka na seko awa te, kasi tojali koluka mboka elingi koya." (Baebele 13:12,13). Epai yango ejali Nkolo ejali epai na kobulama. Soko moto alingi kofanda esika moko na Nkolo, ye ajangi kobulisama, mpe likambo moko eyebi kokokisa ye na kobulama yango, ete, makila na Mokonji.

Tojalaki na kati na masumu mingi; tokobonga koingela na ndako na Njambe boni? Ye ajali bobele mpeto, biso topoli; ye ajali pole, biso bobele molili. Tokoyeba kojala na mpiko na kokota na ndako na ye wapi? "Boye bandeko, tojali na molende ete toingela na Esika na bulee mpo na makila na Yesu, na njela na sika mpe na bomoi oyo ye asili kojipwela biso, koleka kati na elamba, yango mosuni na ye." (Baebele 10:19-20). Mpo ete Yesu ajali na kati na esika yango na bulee, biso toyebi koingela epai na ye na nguya na makila na ye.

"Tika ete Njambe na kimia, ye oyo akambaki Nkolo na biso Yesu lisusu longwa na bakufi, ye Mobateli monene ba bampate, mpo na makila na kondimana na seko, abongisa bino na misala yonso na malamumu ete bosala mokano na ye, awa ejali ye kosala kati na bino yango ekosepelisa ye mpo na Yesu Klisto. Na ye nkembo libela na libela. Amen." (Baebele 13:20-21)

© C.E.R.S. - B.P. 1673 Kananga
République Démocratique Du Congo
Email: 33eme.cers.lit@gmail.com

<http://www.33eme-cers.org/>